

NACRT

Na osnovu člana 22. Statuta Brčko distrikta Bosne i Hercegovine („Službeni glasnik Brčko distrikta Bosne i Hercegovine“, broj:2/10-prečišćeni tekst) i člana 125a. Krivičnog zakona Brčko distrikta Bosne i Hercegovine („Službeni glasnik Brčko distrikta Bosne i Hercegovine, broj:19/20-prečišćeni tekst, 3/24 i 14/24), Skupština Brčko distrikta Bosne i Hercegovine na ____ sjednici, održanoj dana ____ godine, usvaja

ZAKON O POSEBNOM REGISTRU LICA PRAVOSNAŽNO OSUĐENIH ZA KRIVIČNA DJELA SPOLNOG ZLOSTAVLJANJA I ISKORIŠTAVANJA DJETETA

DIO PRVI-OPŠTE ODREDBE

Član 1. (Predmet)

Zakonom o posebnom registru lica pravosnažno osuđenih za krivična djela spolnog zlostavljanja i iskorištavanja djeteta (u daljem tekstu: Zakon) propisuje se uspostavljanje i vođenje Posebnog registra lica pravosnažno osuđenih za krivična djela spolnog zlostavljanja i iskorištavanja djeteta (u daljem tekstu: Registar), određuju lični podaci koji se upisuju u Registar i način njihovog čuvanja i davanja na korištenje, stepen njihove povjerljivosti, kao i posebne mjere koje se sprovode prema licima pravosnažno osuđenim za krivična djela spolnog zlostavljanja i iskorištavanja djeteta.

Član 2. (Cilj)

Cilj donošenja ovog zakona je obezbjeđivanje zaštite djeteta od spolnog zlostavljanja i iskorištavanja, te sprečavanje lica pravosnažno osuđenih za ta krivična djela da ponovo izvrše isto ili slično krivično djelo.

DIO DRUGI - PODRUČJE PRIMJENE, SADRŽAJ I VOĐENJE REGISTRA

Član 3. (Upis lica u Registar)

(1) U Registar se upisuju lica koja se vode u kaznenoj evidenciji Policije Brčko distrikta Bosne i Hercegovine (u daljem tekstu: Policija), a koja su pravosnažno osuđena za krivična djela propisana Krivičnim zakonom Brčko distrikta Bosne i Hercegovine („Službeni glasnik Brčko distrikta Bosne i Hercegovine, broj:19/20-prečišćeni tekst, 3/24 i 14/24) (u daljem tekstu: Krivični zakon), kada su učinjena prema djeci i maloljetnicima, i to:

- a) silovanje (član 200. Krivičnog zakona);
- b) spolno uznemiravanje (član 200a. Krivičnog zakona);
- c) spolni odnos s nemoćnim licem (član 201. Krivičnog zakona);
- d) spolni odnos zloupotrebom položaja (član 202. Krivičnog zakona);

- e) prinuda na spolni odnos (član 203. Krivičnog zakona);
- f) bludne radnje (član 205. Krivičnog zakona);
- g) trgovina djecom (član 207b. Krivičnog zakona);
- h) spolni odnos s djetetom mlađim od 15 godina (član 207d. Krivičnog zakona);
- i) spolna zloupotreba djeteta starijeg od 15 godina (član 207e. Krivičnog zakona);
- j) navođenje djece za zadovoljenje spolnih potreba (član 207f. Krivičnog zakona);
- k) zadovoljenje spolnih strasti pred djetetom (član 207g. Krivičnog zakona);
- l) navođenje djeteta na prostituciju (član 207h. Krivičnog zakona);
- m) iskorištavanje djeteta radi pornografije (član 207i. Krivičnog zakona);
- n) iskorištavanje djeteta za pornografske predstave (član 207j. Krivičnog zakona);
- o) upoznavanje djeteta s pornografijom (član 207k. Krivičnog zakona).

(2) Osim lica iz stava (1) ovog člana, u Registar se upisuju i:

- a) lica koja se vode u kaznenoj evidenciji Policije pravosnažno osuđena za krivična djela protiv spolnog integriteta izvršena na štetu djece i maloljetnika prema važećem zakonodavstvu u Bosni i Hercegovini;
- b) lica koja se vode u kaznenoj evidenciji Policije, a koja su pravosnažno osuđena za krivična djela protiv spolnog integriteta izvršena na štetu djece i maloljetnika, prema zakonima koji su prestali da važe;
- c) lica koja su pravosnažno osuđena za krivična djela protiv spolnog integriteta izvršena na štetu djece i maloljetnika, čija se kaznena evidencija ne vodi kod Policije, a koja u Brčko distriktu Bosne i Hercegovine (u daljem tekstu: Brčko distrikt BiH) imaju prijavljeno prebivalište, odnosno boravište.

Član 4. **(Podaci u Registru)**

(1) U Registar se upisuju sljedeći podaci o licima iz člana 3. ovog zakona:

- a) prezime i ime, prethodno prezime i ime (ukoliko ga je bilo), djevojačko prezime, nadimak i lažno ime, datum rođenja, prezime i ime roditelja i djevojačko prezime majke;
- b) mjesto, grad, odnosno opština i država rođenja;
- c) jedinstveni matični broj;
- d) državljanstvo;
- e) prebivalište, odnosno boravište sa naznačenjem adrese stanovanja u vrijeme izvršenja presude;
- f) naziv suda i grada, odnosno opštine na čijoj se teritoriji sud nalazi, a za strani sud naziv države, broj i datum odluke prvostepenog suda koja je postala pravosnažna, odnosno odluke višeg suda ako je tom odlukom preinačena odluka prvostepenog suda;
- g) zakonski naziv krivičnog djela sa naznačenjem člana, stava i tačke zakona koji je primijenjen;
- h) vrsta kazne i mjere bezbjednosti sa naznačenjem u kojem trajanju je izrečena;

- i) podaci o pravnim posljedicama osude;
 - j) promjene u vezi sa upisanim podacima sa naznačenjem organa koji je donio odluku i podatke o toj odluci;
 - k) podaci o zaposlenju;
 - l) podaci značajni za fizičko prepoznavanje osuđenog i njegovu fotografiju u vrijeme stupanja na izdržavanje kazne zatvora i u vrijeme izlaska iz ustanove za izvršenje krivičnih i prekršajnih sankcija kao i pri svakom javljanju Policiji;
 - m) DNK profil osuđenog;
 - n) datum stupanja na izdržavanje kazne zatvora;
 - o) datum otpuštanja sa izdržavanja kazne zatvora;
 - p) podaci o sprovođenju posebnih mjera propisanih ovim zakonom.
- (2) Podaci iz stava (1) ovog člana predstavljaju tajni podatak, u skladu sa propisom kojim je uređena zaštita tajnih podataka.

Član 5. (Vođenje Registra)

- (1) Registar vodi Policija.
- (2) Podaci iz Registra vode se trajno i ne brišu se.

Član 6. (Upis podataka)

- (1) Upis podataka u Registar vrši se na osnovu pravosnažno izrečenih presuda za krivična djela iz člana 3. ovog zakona.
- (2) Pravosnažne presude iz stava (1) ovog člana Policiji dostavlja sud.
- (3) Podatke o stupanju na izdržavanje kazne, kao i o datumu otpuštanja sa izdržavanja kazne, Policiji dostavlja ustanova za izvršenje krivičnih sankcija u kojoj osuđeni izdržava kaznu zatvora.

Član 7. (Dostavljanje podataka sudu, tužilaštvu i organima unutrašnjih poslova)

Podaci iz Registra mogu se dati:

- a) sudu, tužilaštvu i organima unutrašnjih poslova u vezi sa krivičnim postupkom koji se vodi protiv lica upisanog u Registar;
- b) tužilaštvu i organima unutrašnjih poslova u vezi sa otkrivanjem učinilaca krivičnih djela iz člana 3. ovog zakona, nadležnim organima za izvršenje krivičnih sankcija i nadležnim organima koji učestvuju u postupku davanja uslovnog otpusta, amnestije ili pomilovanja.

Član 8.
(Dostavljanje podataka drugim organima)

(1) Podaci iz Registra mogu se dati organima i organizacijama, ustanovama, institucijama i udruženjima koja u obavljanju poslova iz svoje nadležnosti ostvaruju neposredan kontakt sa djecom ako za to postoji opravdan interes, kao i drugim organima, organizacijama i ustanovama koje su nadležne za vođenje postupaka za ostvarivanje zaštite prava i interesa djece.

(2) Organi iz stava (1) ovog člana obavezni su da prilikom prijema u radni odnos ili angažovanja određenog lica za obavljanje poslova koji dovode do neposrednog kontakta sa djecom zatraže od Policije podatak da li je to lice upisano u Registar.

(3) Ukoliko lice za koje se traže podaci nije upisano u kaznenoj evidenciji koja se vodi u Brčko distriktu BiH, Policija će obavezno zatražiti podatke o osuđivanosti za krivična djela iz člana 3. ovog zakona od nadležnog organa koji tu evidenciju vodi.

Član 9.
(Dostavljanje podataka inostranim državnim organima)

Podaci iz Registra mogu se dati i inostranim državnim organima, u skladu sa pravilima međunarodne pravne pomoći.

Član 10.
(Obaveza izdavanja uvjerenja i njihova upotreba)

Dostavljanje podataka iz Registra vrši se izdavanjem uvjerenja o podacima iz Registra i smiju se upotrijebiti samo u svrhu za koju se daju.

Član 11.
(Primjena posebnih mjera)

(1) Lice koje je pravosnažno osuđeno za krivično djelo iz člana 3. ovog zakona dužno je da se u roku od 15 dana od dana izdržane kazne lično javi Policiji i da se svakih šest mjeseci od dana izdržane kazne lično javlja Policiji.

(2) Policija je obavezna fotografisati lice koje ima obavezu javljanja propisanu u stavu (1) ovog člana, prilikom svakog javljanja.

Član 12.
**(Obavezno obavješćavanje o putovanjima izvan mjesta stanovanja
i promjeni ličnih podataka)**

Lice koje je pravosnažno osuđeno za krivično djelo iz člana 3. ovog zakona obavezno je da obavijesti Policiju o svakom putovanju van mjesta prebivališta, odnosno boravišta, odredištu i dužini trajanja putovanja najkasnije 24 časa prije putovanja, te da u roku od tri dana prijavi svaku promjenu ličnih podataka.

Član 13.
**(Obavezno uzdržavanje od posjećivanja mjesta
i objekata na kojima se okupljaju djeca)**

U cilju zaštite bezbjednosti djece od seksualnog zlostavljanja i iskorištavanja, učiniocima krivičnih djela iz člana 3. ovog zakona utvrđuje se obaveza da se uzdržavaju od posjećivanja mjesta na kojima se okupljaju djeca i objekata u kojima se okupljaju djeca, kao što su školske zgrade, školska dvorišta, vrtići, igrališta, igraonice, dječije manifestacije i slično.

Član 14.
(Upoznavanje sa posebnim mjerama i njihovo trajanje)

(1) Ustanova za izvršenje krivičnih i prekršajnih sankcija prilikom otpuštanja lica sa izdržavanja kazne izrečene za krivično djelo iz člana 3. obavezna je da upozna to lice sa obavezama iz članova 11., 12. i 13. ovog zakona.

(2) Ako se upis lica u Registar vrši na osnovu podataka iz kaznene evidencije, Policija će u roku od 30 dana nakon upisa u Registar obavijestiti upisano lice o obavezama iz članova 11., 12. i 13. ovog zakona.

(3) Obaveze iz članova 11., 12. i 13. ovog zakona prestaju nakon proteka 20 godina od dana izdržane kazne, ukoliko lice u tom periodu ne izvrši neko od krivičnih djela iz člana 3. ovog zakona.

DIO TREĆI- ZAVRŠNE I PREKRŠAJNE ODREDBE

Član 15.
(Prekršajne odredbe)

(1) Novčanom kaznom od 1.000 KM do 5.000 KM kazniće se odgovorno lice iz člana 6. ovog zakona ako u propisanom roku ne dostavi podatke organu nadležnom za vođenje Registra.

(2) Novčanom kaznom od 5.000 KM do 15.000 KM kazniće se odgovorno lice u pravnom licu i samostalni preduzetnik ako od nadležnog organa ne zatraži podatke u skladu sa članom 8. ovog zakona.

(3) Novčanom kaznom od 1.000 KM do 5.000 KM kazniće se za prekršaj lice upisano u Registar koje ne izvrši neku od obaveza navedenih u članovima 11., 12. i 13. ovog zakona.

(4) Novčanom kaznom od 500,00 KM do 2.000 KM kazniće se za prekršaj lice koje zloupotrijebi podatke iz Registra u cilju zastrašivanja ili uznemiravanja lica upisanih u Registar ili članova njihove porodice ili te podatke javno objavi.






Član 16.
(Stupanje na snagu)

Ovaj zakon stupa na snagu osmog dana od dana objavljivanja u „Službenom glasniku Brčko distrikta Bosne i Hercegovine“.

Broj:
Brčko, . godine

PREDSJEDNIK
SKUPŠTINE BRČKO DISTRIKTA
BOSNE I HERCEGOVINE

Radna grupa:

Srđan Nedić, , predsjednik,
Nebojša Savić , član,
Gordana Radovanović, , član,
Majda Mustedanović , član,
Merima Mujkić , član.